

Come se scrivelo per fodom?

Considerazion davò l cors de ladin metù a jì da l'Union dei Ladins

Cultura - Cànche ne toca scrive vélch se disc dagnàra “mi no son bonno me ven...no n'é temp”, ogni viertola l'é bona. L'é vera che temp se n'à puoch e mi no n è debòta mei fat i compiti che la Nadia ne deva a césa perciéche ève auter da fè. Coscita me prove ades a mète ju doi righe.

St'aisciuda s'on ciapé de na dejina co la Nadia Chiocchetti da Moena che la n'à de segur fat capì che l'é diferente co che se scrif da

co che se descor. Zerto che aldidancuoi l'é dagnàra plu stentous descore polito per fodom. L. talián, per via de la radio, i giornai, la televijion e l jì fòra a studié l'à ciapé la souramëssa. Da come che se sent i tosac a descore, datrac ven proprio i sgric: “me son desmentié”, “me son pensè”, “me son ciauriè”, “voi scende”, “ciolé le scarpe”.

Ci volelo dì? Forsci vol dì che no n'é demè i mass media la colpa, ma ince i gragn che no ie descor

plu polito. Ence nos mossonve jì a se cherì sul dizionar chëlche parola che no n onve mei sentù a dì. Mparé a scrive e a lieje fodom de segur dáida a no pierde nost lingaz e l'é sciode che nte le scòle no vegne fat debòta nia. N'à sapù bel, ma no n on de segur emparé assè, percié che per scrive ste diesc righe on metù scialdi trop. Speron de podei mparé ncora velch el proscimo viade e che siebe ncora valgugn de autri con nos. (Luìgina e Emanuela)



Nvalgugn de chi che à tout pèrt al cors de ladin metù a jì da L'Union dei Ladins da Fodom co la Nadia Chiocchetti. Mancia: Cristian Azzolini, Tiziana Bozzolla, Lisa Soratroi, Manuela Ladurner.